

Mervin Wyatt-Ras di AVP: E 'safety code' nunca a drenta na vigor

No tin un sistema di registracion di casonan di abuso sexual di mucha

ORANJESTAD (AAN) – Parlamentario Mervin Wyatt-Ras, di fraccion di AVP, den conferencia di prensa a elabora riba e tema di abuso sexual di menor.

Ampliando riba e tema, e parlamentario a señala cu ora e mucha abusa bira adolescente, e por presenta problema di relacion cu otro persona, of den caso di mucha muher e por pasa di un relacion pa otro, tin diferente pareha den su temporada di teenager, of e por pleita y hasta cay den consumo di alcohol y drogadiccion.

“Automutilacion ta un forma cu tambe hobennan ta expresa nan dolor, pa medio di corta nan mes of haci nan culpa daño, pa sinti e ora ey pasobra na dado momento nan ta siña pa no sinti nada” Hyatt

Ras a splica. El a agrega cu e hobennan aki, cu a wordo abusa di mucha, por desaroya problemanan psicologico-psiquiatrico, incluyendo bipolaridad, depresion, etc., y hasta tin cu ta comete suicidio. E parlamentario a comenta cu tin di nan ta bisa cu nan ta sinti manera un tapijt cu hende por cana riba dje y ningun hende ta scucha nan. Ta di gran importancia pa e ayudo wordo regla, pero tambe e prevencion. “Prevencion ta hopi importante y mi tin cu bisa cu gobierno di AVP a inverti hopi den prevencion, pa loke ta casonan di abuso di mucha den sentido di fortifica e instancianan cu ta bay scol, esnan cu ta duna informacion, y esnan cu ta traha cu hobennan pa asina fortifica nan”, e dama Parlama-

rio a subraya. El a agrega cu tabata tin diferente programa cu a wordo desaroya y inicia conhuntamente cu UNICEF. Tocante e ayudo mes, parlamentario Wyatt-Ras a bisa cu tin diferente aspecto cu e gobierno actual a priminti ora el a asumi su responsabilidad. Ora el a inicia a bisa cu tin un crisis social pasobra dos mucha a perde nan bida door di nan mesun mayor y nan padrastro, y asina nan a conclui cu tin un crisis y a nombra yen di hende y a pone 10 miyon pa un año, 10 miyon pa e otro año pa asina por yuda e sector social. “Sinembargo, por ripara cu diferente instancia cu ta traha riba e casonan, no a haya ayudo manera nan a pensa cu nan lo haye”, el a acentua.

“Ademas, a nombra diferente per-

sona pero e yudanza mes pa e victim no a yega manera cu e ta. Por ehemplo, no tin un sistema di registracion den cual por bisa cu den e caso di e hoben aki ta cerca e instancia aki, y por wak kico a pasa cu e hoben”, Wyatt-Ras a señala. Desde inicio di e gobernacion aki esaki tabata un di e peticionnan, pero e no a wordo realiza.

“Ademas e safety code cu a priminti y cu a papia tanto di dje, nunca a bin na vigor. Nan ta bisa cu ta trahando riba dje, pero ta importante cu ora un profesional haya un caso di abuso di mucha, e sa kico pa haci, ki stap pa tuma, ken pa contacta pa e proceso por cuminsa cana pa asina e victima por haya yudanza”, Parlamentario Wyatt-Ras a indica.